

# **Phawuloosi Efesoona Asaas**

## **Xaafida Kiitaa**

## **Gaatha Qofaa**

Phawuloosi Efesoonaan de7iya asaas xaafida kitian ubbaafe aathidi xeellidabay, “Wodey gakkiya wode Xoossay polanaw qoppida qofay, saloninne sa7an de7iya medhetetha ubbay Kiristtoosappe garssan gidana mellassa” yaagiya qofaa (1:10). Hessa bolla gujjidi Yesuus Kiristtoosara de7iya issifetethan, asa zerethi ubbay issino gidana mela ha gita qofaa oo son peeshhana mela Xoossaas asaa hassayisees.

Efesoona kiitaa koyro kifiliyan xaafey kaara qofa gidida issifetethabaa xaafanaw doomidayssa dalggisidi, Xoossaas Aaway ba asaa waati dooridaakkko, enttika iya na7aa, Yesuus Kiristtoosan bantta nagaraappe maarota demmidi waanidi la77a keyidaakkonne, Xoossaas gita ufayssa qaalay Geeshsha Ayyaana baggara tuma gideyssi erettidaakkko odee. Nam77antho kifiliyan qassi xaafey ha kiitaa nabbabiya asay bantta issifetethaa de7uwani Kiristtoosan enttaw de7iya issifetethay tuma gidana mela entti waanidi daanaw bessiyako qofisees.

Asay Kiristtoosan de7iya issifetethaa waanidi daanaw bessiyako dumma dumma leemison qonccis. Woosa keethi asatethaa leemiso gidiya wode Kiristtoosi he asatethaa huu7e. Woosa keethi gimbbe keethan leemisettiya wode Kiristtoosi he keethaa godaa xaphuwa minthiya waanna

shuchchaa. Woosa keethi machchin leemiset-tiya wode Kiristtoosi azinan leemisettis. Xaafey Kiristtoosa baggara qonccida Xoossaan Aadho kee-hatethaa daro nashshidi odishe, giddoy ciim-mottiya haasaya haasayees. I ubbabaa, Kirist-toosa siiquwa, iya yarshshetethaa, I immida na-gara atotethaa, iya Aadho keehatethaanne iya geeshshatethaa baggara xeellees.

### **Efesoona kiitaa ayfe qofata**

Sarotho 1:1-2

Kiristtoosanne woosa keethi 1:3-3:21

Kiristtoosan de7iya ooratha de7uwa 4:1-6:20

Kuushsha qofaa 6:21-24

<sup>1</sup> Xoossaan shenen Kiristtoos Yesuusa hawaare gidida Phawuloosappe, Efesoonaan de7iya geeshshatasinne Kiristtoos Yesuusa ammaneyssatas xaafettida kiitaa.

<sup>2</sup> Xoossaan nu Aawappenne Godaa Yesuus Kirist-toosappe Aadho keehatethaynne sarotethay hint-tew gido.

### *Kiristtoosan de7iya ayyaana anjuwaa*

<sup>3</sup> Salon de7iya ayyaana anjo ubban Kiristtoosa baggara nuna anjjida, nu Godaa Yesuus Kirist-toosa Aaway, Xoossay galatetto. <sup>4</sup> Nuuni iya sinthan geeshshatanne borey baynnayssata gi-dana mela Xoossay alamey medhettanaappe kase Kiristtoosa baggara ba siiquwan nuna dooris.

<sup>5</sup> Xoossay ba sheniyaa ba dosidayssada Yesuus Kiristtoosa baggara nuna ba nayta oothanaw kasetidi qoppi wothis. <sup>6</sup> Xoossay ba siiqiya Na7aa

baggara nuus coo immida aadho keehatethay bonchchettana mela hessa oothis.

<sup>7</sup> Xoossa aadho keehatethaa duretethaada Kiristtoosa suuthan wozettidi nagara atotethaa demmida. <sup>8</sup> Ba aadho keehatethaa cinccatethaninne eratethan kunthidi nuus immis. <sup>9</sup> Xoossay ba dosidayssada Kiristtoosa baggara iya sheniya xuuraa nu erana mela oothis. <sup>10</sup> Wodey gakkiya wode Xoossay polanaw qoppida qofay, saloninne sa7an de7iya medhetetha ubbay Kiristtoosappe garssan gidana melassa.

<sup>11</sup> Ubbabaaa ba sheniyada oothiya Xoossay, kasetidi ba qoppi wothidayssada Kiristtoosa baggara nuuni iyabaa gidana mela nuna dooris. <sup>12</sup> Hessa I oothiday, Kiristtoosan ufayssi wothidi naagon koyro gidida nuuni Xoossa bonchchuwa galatan qonccisana melassa. <sup>13</sup> Hintteka hintte atotethaa Wonggelaa, hessika tuma qaala si7ida wode Kiristtoosa ammanideta. Xoossay hinttew immana gida Geeshsha Ayyaanahintte attametideta. <sup>14</sup> Xoossa bonchchoy galatettana mela Xoossay ba asaa wozana gakkanaaw Geeshsha Ayyaanahnuus oythu oothidi immis.

### *Phawuloosa woosaa*

<sup>15</sup> Hessa gisho, Godaa Yesuusa hintte ammaneyssanne geeshshata ubbaa hintte siiqeyssa ta si7ida wode <sup>16</sup> ta woosan hinttena qoppashe hintte gisho Xoossa galateyssa aggabikke. <sup>17</sup> Godaa Yesuus Kiristtoosa Xoossay, bonchcho Aaway, Xoossa hintte aathi eranaada cinccatethaanne qonccetha ayyaana hinttew immanaada taani Xoossa woossays. <sup>18</sup> Xoossay

hinttena xeegida ufyayssaynne geeshshati laattiya bonchcho laatay ay mela darookko hintte erana mela Xoossay hintte wozana ayfiyaa dooyana mela taani Xoossa woossays.

<sup>19</sup> Qassi iya ammaniyaa nunan oothiya iya wolqqay ay mela aadhhdida giteekko hintte erana mela woossays. He wolqqay xoonettonanne daaburonna wolqqaa. Ha nunan de7idi oothiya wolqqaynne, <sup>20</sup> Kiristtoosa hayqoppe denthidi, salon Xoossaafe ushachcha baggara utisida gita wolqqay issino. <sup>21</sup> Iya sunthay, ayseyssatappenne maata aawatappe, haareyssatappenne godatappe, bolla gididi ha alamiya xalaalan gidonnashin sinthafe yaana alamiyankka hara sunthata ubbaafe dhoqqa. <sup>22</sup> Xoossay ubbaa Kiristtoosa tohuwappe garssan haarisis; qassi woosa keethan ubbabban Goda gidana mela iya shuumis. <sup>23</sup> Woosa keethay Kiristtoosa kumethi oothiya iya asatethaa. Medhetethay de7iya bessa ubban Kiristtoosi ba huu7en ubbabaa kuntheyssa.

## 2

### *Kiristtoosan hayqoppe de7o pinethi*

<sup>1</sup> Hayssafe kase hintee, hintte nagaraanne hintte qohuwa gaason hayqqidayssata. <sup>2</sup> He wode hintte ha alamiya iita ogiya kaallideta. Carkkuwa bolla de7iya ayyaana wolqqata halaqaasinne ha77ika Xoossaas kiitettonna asaa haariya ayyaanas kiittideta. <sup>3</sup> Nu ubbayka kase he asata giddon nu asho amuwaanne nu wozanaa

sheniya kaallidi de7ida. Nukka harata mela nu medhetethan Xoossaa hanquwa ekkanaw de7eyssata.

<sup>4</sup> Shin Xoossaa gita maarotethaafenne nuus de7iya gita siiquwappe denddidayssan, <sup>5</sup> hari attoshin nuuni nu qohuwan hayqqidi de7ishin Kiristtoosa baggara nuus de7o immis. Hintteka attiday Xoossaa aadho keehatethaana. <sup>6</sup> Xoossay nuna Kiristtoosara issife hayqoppe denthidi salo sohuwan iyara issife wothis. <sup>7</sup> I hessa oothiday, Kiristtoos Yesuusa baggara nuus qonccisida ba keehatethaanne zawi baynna ba aadho keehatetha duretethaa yaana laythan nuna bessanaassa. <sup>8</sup> Hintte aadho keehatethan ammanon attideta. Hessika, Xoossaa imotappe attin hintte oooson benttidabaa gidenna. <sup>9</sup> Oonikka ceeqettonna mela atotethay benttiday oooson gidenna. <sup>10</sup> Nuuni Xoossaa medhetethi; I nuus kasetidi giigisi wothida lo77o oosota oothana mela Kiristtoos Yesuusa baggara oorathi medhettida.

### *Kiristtoosara de7iya issifetethaa*

<sup>11</sup> Hessa gisho, hinttenoo yeletan Ayhude gidon-nayssato, Ayhudeti bantlaw asa kushen qaxxaret-tidi, hinttena qassi qaxxarettiboonayssata gidi xeegeyssa akeekite. <sup>12</sup> He wode hintte Kirist-toosappe shaaketti de7idayssa, Isra7eele asaas al-laga gididi de7idayssa, Xoossaa ufayssa qaalappe haakkidi de7idayssanne ha alamiyan ufayssinne Xoossi baynna de7idayssa akeekite. <sup>13</sup> Shin hintte kase haakkidi de7idayssati, ha77i Kiristtoos Yesu-usan de7idi Kiristtoosa suuthan mata shiiqideta.

<sup>14</sup> Kiristtoosi nu sarotethaa; I Ayhudenne Ayhude gidonna asaa timidi, nam77aa shaakki wothida morkketetha godaa laallis. <sup>15</sup> I banan ha nam77u zaretappe issi ooratha ase medhdhidi, higgiya iya kiitaranne wogatara issife ba asatethan dhayssidi sarotethi immis. <sup>16</sup> Kiristtoosi masqaliya bolla hayqqidi morkketethaa dhayssis; qassi nam77u zareta issi asatethi oothidi Xoossaara sigethis. <sup>17</sup> Kiristtoosi yidi, Xoossaafe haakkidi de7iya hinttew, qassi matidi de7iya enttaw sarotetha Wonggelaa odis. <sup>18</sup> Nu ubbay iya baggara issi Ayyaanen Aawa sinthe shiiqanaw dandda7os.

<sup>19</sup> Hizappe hintte allaga woykko imathe gidekketa, shin hintte ha77i geeshshata biittaa asinne Xoossa soo asi. <sup>20</sup> Hintte hawaaretinne nabeti baasida baasuwa bolla keexettideta. Godaa xaphuwa minthiya shuchchay Kiristtoos Yesuusa. <sup>21</sup> Iyan keetha ubbay issife oykettidi Godan geeshsha Xoossa keethi gidanaw diccees. <sup>22</sup> Hintte qassi Xoossay ba Ayyaanen de7iya keethi gidanaw Kiristtoosan issife keexetteta.

### 3

#### *Ayhude gidonna asaas hawaare gidida Phawuloosa*

<sup>1</sup> Hessa gisho, taani, Phawuloosi, Ayhude gidonna hintte gisho Kiristtoos Yesuusan qasho asi gidas. <sup>2</sup> Ta hinttena maaddana mela Xoossay ba aadho keehatethan taw immida ha oosuwabaa hintte loythi si7ideta. <sup>3</sup> Ta hinttew kase qanthan xaafidayssada Xoossay ba xuuraa qonccethan taw

qonccisis. <sup>4</sup> Ta xaafidayssa hintte nabbabiya wode Kiristtoosa xuuraa ta ay mela eridaakkko hintte akeekanaw dandda7eeta. <sup>5</sup> Ha xuuray geeshsha hawaaretasinne nabetas ha77i Ayyaana baggara qonccidayssada beni wode asaas hessada qonccisibeenna. <sup>6</sup> Xuuray hayssa: Ayhude gi-donna asay Wonggelaa baggara Isra7eeletara is-life Xoossaa anjuwaa laattoosona. Isra7eeletara issi keetha asi gidoosona; Kiristtoos Yesuusa baggara Xoossaa ufayssa qaala ekkoosona.

<sup>7</sup> Xoossay ba oothiya wolqqaa baggara taw immida aadho keehatethan ha Wonggelas oosanchcho gidas. <sup>8</sup> Taani geeshshata ubbaafe laafa gidikkoka Ayhude gidonna asaas zawi baynna Kiristtoosa duretethaa Wonggelaa odana mela ha aadho keehatethay taw imettis. <sup>9</sup> Qassi kase wodiyen ubbaa medhdhida Xoossan qosettidi de7iya xuuras, Xoossaa qofay aybeekko qonccisanaw aadho keehatethay taw imettis. <sup>10</sup> Xoossay hessa oothiday ha77i wodiyen woosa keetha baggara salo sohuwan de7iya halaqatasinne haareyssatas ba dumma dumma qonccethaa erisanaassa. <sup>11</sup> Xoossay ba merinaa qofaa nu Godaa Kiristtoos Yesuusa baggara polanaw hessa oothis. <sup>12</sup> Nu ammanon yashshi baynna Xoossako shiiqana mela Kiristtoosi nuus minutethinne la77atethi immis.

<sup>13</sup> Taani hintte gisho waaye ekkiya gisho hintte ta waayan yeellatonnaada hinttena woossays; taani hintte bonchchuwas waayettays.

### *Efesoona asaas woosettida woosaa*

<sup>14</sup> Taani aawa sinthan gulbatada woossey hessa gishossa. <sup>15</sup> Saloninne sa7an de7iya issi issi soo asay iyan sunthettees. <sup>16</sup> Xoossay ba bonchcho duretethaafe hintte garssa asatethaa minthiya wolqqaa ba Ayyaana baggara immana mela hinttew woossays. <sup>17</sup> Qassi ammanon Kiristtoosi hintte wozanan daana melanne hintte siiqon xapho yeddidi minnidi daana mela woossays. <sup>18</sup> Hessadakka, Kiristtoosa siiqoy ay mela dalggeko, adusseeko, dhoqqekonne ciimmooko geeshshata ubbaara eriya wolqqaa hintte akeekana mela woossays. <sup>19</sup> Eratethaafe aadhdhiya Kiristtoosa siiquwa hintte erana mela qassi de7o immiya Xoossaas wolqqan hintte kumana mela ta woossays.

<sup>20</sup> Hiza, nu giddon oothiya ba wolqqaa baggara nuuni woosseyssafe woykko qoppeyssafe aathidi oothanaw dandda7iya Xoossaas, <sup>21</sup> woosa keethanine Kiristtoos Yesuusan wode ubban merinaappe merinaa gakkanaw bonchchoy gido. Amin77i.

## 4

### *Kiristtoosara de7iya issifetethaa*

<sup>1</sup> Hiza, Godaa gisho qashettida taani, hintte xeegettida xeessas bessiya de7o daana mela hinttena woossays. <sup>2</sup> Hintte ubba wode aadanne hayo gidite; issoy issuwa dandda7itenne siiqon de7ite. <sup>3</sup> Sarotethan qashettidi Ayyaanay immiya issifetethaa naaganaw minnite. <sup>4</sup> Xoossay hinttena xeegida wode issi ufayssas xeegidayssada issi asatethinne issi Ayyaani de7ees. <sup>5</sup> Issi Goday, issi

ammanoynne issi xinqqatey de7ees. <sup>6</sup> Ubbaafe bolla gidida, ubbaa baggara oothiyanne ubbaa giddon de7iya issi Xoossay, ubbaa Aaway de7ees.

<sup>7</sup> Shin Kiristtoosi immanaw koyidayssada nu issoy issoy dumma dumma imota ekkida. <sup>8</sup> Hessa gisho, Xoossa qaalay,

“I pude keyida wode

di7ettida darota baara ekkidi bis;  
assaaskka imotaa immis”

yaagees. <sup>9</sup> Yaatin, “Pude keyis” guussay woy guussee? I koyro duge, sa7aa ziqlqa bessaa wodhdhis guussu gidonna ixxiko ay gussee? <sup>10</sup> Ha duge wodhdhidayssi, ubba bessan benttanaw ubbaafe dhoqqa saluwa keyidayssi iya.

<sup>11</sup> I issota issota hawaareta, issota issota nabeta, issota issota Wongela sabaaketa, issota issota woosa keethi heemmeyssata, issota issota asttamaareta oothidi immis. <sup>12</sup> I hessa oothiday Kiristtoosa asatethi gidida woosa keethi dichchanawunne ammaniyyaa asaa Xoossa oosos giigisanaaassa. <sup>13</sup> Hessadakka, nu ubbay Xoossa Na7aa eridi ammanon benttiya issifetethaakko gakkidi, Kiristtoosa ayyaana de7uwa kumethaa gakkidi diccana melassa.

<sup>14</sup> Hizappe guye, asaa gene cimon giigida balethiya worddo timirtte carkkoninne hobben gedenne haa kuullo kaa7iya nayta mela gidanaw bessenna. <sup>15</sup> Shin nuuni tumaa siiqon odishe asatethaa huu7e gidiya Kiristtoosara de7iya issifetethaa gujji gujji dichchoos. <sup>16</sup> Kumetha asatethay Kiristtoosa bolla zemppees qassi dumma dumma asatetha billiteti issov issuwara

oykettidi uttis. Issi issi asatetha kifiley ba oosuwa oothiya wode kumetha asatethay siiqon diccees.

### *Kiristtoosan ooratha de7o*

<sup>17</sup> Hessa gisho, taani hayssa hinttew Godaa sunthan odaysinne markkattays. Go77i baynna qofaa qoppiya Ayhude gidonna asatada de7oppite. <sup>18</sup> Entta qofay dhumiis; bantta wozanaa muumisidosona. Entti eratetha dhayoninne ixxas gidi Xoossay immiya de7uwappe haakkidosona. <sup>19</sup> Entti yeella giyabaa erokkonna; entti laymatethas banttana aathi immidosona; qassi tunabaa ubbaa guye goonna ooothoosona.

<sup>20</sup> Shin hintte Kiristtoosa eriday hessa mela ogen gidenna. <sup>21</sup> Iyabaa tuma si7ideta. Qassi Yesusan de7iya tumaa mela iyappe tamaarideta. <sup>22</sup> Hintte kase de7iya de7o ogiya aggite. Qassi ba cimmiya amon dhaya hintte ceega asatethaa digite. <sup>23</sup> Hintte wozanaa qofan ooraxite. <sup>24</sup> Tuma xillotethanine geeshshatethan Xoossa leemison medhettida ooratha asatethaa ma77ite.

<sup>25</sup> Hiza, worddo odettofite. Nuuni ubbay Kiristtoosa asatethaa billiteta gidiya gisho asa ubbaara tuma odettite. <sup>26</sup> Hanqettite, shin hintte hanquwan nagara oothofite. Hintte hanqeti de7ishin awi wullofo. <sup>27</sup> Xalahes besse immofite. <sup>28</sup> Kaysiya uray hizappe guye kaysotoppo. Shin manqota maaddiyabay iyaw daana mela ba kushen lo77obaa ootho.

<sup>29</sup> Hintte doonappe iita qaali keyoppo. Shin si7eyssata go77ana melanne harata minthethiya

koshshiya lo77o qaali hintte doonappe keyo.  
**30** Xoossay hinttena woziya gallasaas hinttena attamidi wothida Xoossaas Ayyaana azzanthofite.  
**31** Cametethi, yilo, hanqo, waaso, cashshenne iita ubbaa hinttfe haassite. **32** Aathidi issoy issuwas keehanne qadhetteyssata gidite. Xoossay Kiristtoosa baggara hinttew atto gidayssada hintteka wolis atto giite.

## 5

**1** Hiza, Xoossay dosiya naytada iya daanite.  
**2** Kiristtoosi nuna dosidi bana nu gisho Xoossaas sawiya imonne yarshsho oothidi immidayssada hintteka siiqon de7ite.

**3** Shin laymatethi, tunatethinne uuzetethi ammaniyyaa asaas bessonna gisho hintte giddon ubbaraka si7ettofo. **4** Xoossaas galatiteppe attin yeellabaynne eeya odi woykko qidhey hinttew bessonna gisho hintte giddon ubbaka de7oppo.  
**5** Hayssa erite; oonikka laymatey woykko tunabaa oothey woykko uuzettey Kiristtoosa kawotethaanne Xoossaas kawotethaa laattanaw dandda7enna. Uuzetethi eeqa goynno mela.

**6** Hayssata gaason Xoossaas hanqoy kiitettonna asaa bolla yaana gisho oonikka hinttena pathonna odan cimmofo. **7** Hessa mela asaara issifetethi oothofite. **8** Kase hintte dhuman de7ideta, shin ha77i Godaa baggara poo7on de7eeta. Hiza, poo7o asada poo7on simerettite.  
**9** Poo7oy lo77otethi, xillotethinne tumatethi ayfees.

**10** Godaa ufyayssiyabaa oothanaw koyite.  
**11** Go77i baynna dhuma ooso qonccisiteppe attin iyara issifoppite. **12** Entti geeman oothiya oosuwa hari attoshin odanawukka yeellayees. **13** Shin ubbabay poo7on keyaa wode qonccen benttees. **14** Poo7oy ubbabaa qonccen bessees. Hessa gisho, “Neno dhiskkeyssso barkka;  
 hayqoppe dendda;

Kiristtoosi ne bolla poo7ana” yaagettis.

**15** Hiza, hintte waanidi de7iyakko akeeki be7ite. Cincata giditeppe attin eeyata gidoppite. **16** Laythay iita gidiya gisho injjetiya wode ubbaa go7ettite. **17** Hessa gisho, Godaa sheney aybeekko akekiteppe attin eeyoppite.

**18** Geeshsha Ayyaan gallas gallas kumiteppe attin dhayokko hinttena kaalethiya gisho woyne ushshan mathottofite. **19** Mazmuren, sabaninne ayyaana yethan, issov issuwara odetite. Qassi hintte wozanan zammarishenne sabbishe Godaa galatite. **20** Nu Godaa Yesuus Kiristtoosa sunthan ubba wode Xoossaa Aawa ubbabaas galatite.

**21** Kiristtoosa bonchchuwas gidi issov issuwas haarettite.

### *Azinabaanne machchibaa*

**22** Machcheto, Godaas haaretteyssada hintte azinatas haarettite. **23** Kiristtoosi woosa keethaas huu7e gideyssada azinikka ba machchees huu7e. Qassi Kiristtoosi ba asatethi gidida woosa keethaa ashsheyssa. **24** Shin woosa keethay Kiristtoosas haaretteyssada machcheti bantta azinatas ubban haarettanaw bessees.

<sup>25</sup> Azinatoo, Kiristtoosi woosa keethaa dosidi bana iw immidayssada hintteka hintte machcheta dosite. <sup>26</sup> I woosa keethaa ba qaala baggara haathan meeccidi geeshshis. <sup>27</sup> Kiristtoosi woosa keethaa qiti woykko som77o tuussi woykko hessa melabay baynna I kumetha bonchchuwara geeshshinne boretonnaaro oothidi baakko shiishanaw koyidi hessa oothis. <sup>28</sup> Hessadakka, azinati banttana doseyssada bantta machcheta dosanaw bessees. Ba machchiw doseyssi bana dosees. <sup>29</sup> Bana ixxiya asi oonikka baawa, shin Kiristtoosi woosa keethaas ooheyssada ba asatethaa muzeesinne naagees. <sup>30</sup> Nuuni Kiristtoosa asatethaa billiteta.

<sup>31</sup> Xoossaa qaalay, “Hessa gisho, asi ba aawanne ba aayiw aggidi, ba machcheera issife daana; entti nam77ayka issi asho gidana” yaagees. <sup>32</sup> Hayssi gita xuura, shin taani hessa Kiristtoosabaanne woosa keethabaa leemiso oothada odays. <sup>33</sup> Gidoshin, hintte issoy issoy hintte machcheta hinttee, hinttena doseyssada dosite. Issi issi machcha ba azinaa bonchchanaw bessees.

## 6

### *Naytabaanne yelidayssatabaa*

<sup>1</sup> Nayto, hintte Godaaba gidiya gisho hinttena yelidayssatas kiittite. Hessi hinttew bessiyabaa.

<sup>2</sup> “Ne aayiwunne ne aawa bonchcha.” Hessi ufayssa qaali de7iya koyro kiitaa. <sup>3</sup> “Ne hessa poliyabaa gidikko ubbay new injetana; ne laythay sa7a bolla aduqqana.”

**4** Aawato, hintte nayta Godaa qaala tamaarssoninne entta kaaleson dichchiteppe attin enttana caamisoppite.

### *Godatabaanne aylletabaa*

**5** Aylleto, Kiristtoosas kiitetteyssada hintte sa7a godatas yashshan, bonchchoninne suure wozanan kiittelite. **6** Entta sinthan saba demmanaw entti be7iya wode xalaala oothofite. Shin Kiristtoosa aylletada Xoossa sheniya wozanappe polite. **7** Asas gidonnashin Godaas gidi hintte kumetha wozanaappe oothite. **8** Aylle gidin woykko goda gidin issoy issoy ba oothida lo77o oosuwas Godaappe woyto ekkanayssa ereeta.

**9** Godato, asa som77o be7idi maaddonna Goday, saluwan de7eyssaa ereeta. Hessa gisho, hintte aylleta manddeyssa aggidi entti hinttew bonchchon kiitetteyssa mela hintte enttaw lo77obaa oothite.

### *Xoossa ola miisheta*

**10** Wursethan, Godaaninne iya gita wolqqan minnite. **11** Xalahe cimuwa eqettanaw dandda7ana mela Xoossay hinttew immida ola miishiya ubbaa ma77ite. **12** Nu olay asara gidonnashin salon de7iya tuna ayyaana olanchchotara, maata aawatara, haareyssataranne ha dhuma alamiya wolqqatara.

**13** Hessa gisho, iita gallasaa teqqanawunne ubbaa polidi, minnidi eqqanaw hintte dandda7ana mela Xoossa ola miisheta ubbaa ma77ite. **14-15** Tumaa xeessan danccoda danccidi, xillotethaa xurureda tiran wothidi, sarotethaa

Wonggelaa hintte tohuwan caammada aathidi minnidi eqqite. <sup>16</sup> He ubbaafe aathidi, Xalahey yeddiya laxiya tama dongge ubbaa toysanaw dandda7iya ammanuwa ubba wode gonddalleda oykkite. <sup>17</sup> Xoossaa atotetha biraata barnneexada hintte huu7en wothite; qassi Geeshsha Ayyaana mashshaa, ikka Xoossaa qaalaa oykkite. <sup>18</sup> Woossa aggoftite; harataskka gaannatite; ubba wode Ayyaanah woossite. Hessian, geeshshatas salettonna minnidi ubba wode woossite.

<sup>19</sup> Taani Wonggelaa xuuraa yashshi baynna qonccisada odana mela Xoossay taw qaala im-mana mela woossite. <sup>20</sup> Taani hessa oothanaw kiitetas ha77ika qashon de7ey he Wonggelaa gishossa. Yaaniya gisho, taani yashshi baynna besseyssada odana mela taw woossite.

### *Wurssetha sarotho*

<sup>21</sup> Taani waana de7iyakkonne ay oothiyako hintte erana mela nu siiqo ishay, Godaa oosuwan ammanettida oosanchchoy, Tikiqoosi, tabaa ubbaa hinttew odana. <sup>22</sup> Nuuni ubbay waanidi de7iyakko hinttew odana melanne hinttena minthethana mela taani iya hintteko kiittas.

<sup>23</sup> Xoossaa Aawappe, Godaa Yesuus Kiristtoos-appe sarotethaynne siiqoy ammanora issife am-maniyaa ubbaas gido. <sup>24</sup> Irxxonna siiqon nu Go-daa Yesuus Kiristtoosa siiqiya ubbaara Xoossaa aadho keehatethay gido.

## **Ooratha Caaquwa Goofatho New Testament in Gofa (ET:gof:Gofa)**

copyright © 2011 Wycliffe Bible Translators, Inc.

Language: Gofa

Translation by: Wycliffe Bible Translators, Inc.

### **Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Gofa

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

---

PDF generated using Haiola and XeLaTeX on 21 Feb 2024 from source files  
dated 30 Dec 2021  
8695a6a5-d671-5199-996c-6069adce0ebd